

**PARTANGIANGAN LINGKUNGAN
BULAN KELUARGA JULI 2026**

**KELUARGA KATOLIK RAP MARDALAN LAHO
MANANGIHON, PATOGUHON, JALA
MAMARITAHON ASA GABE KELUARGA NA
MARPARANGE NA DENGGAN**



**KOMISI KELUARGA
KEUSKUPAN AGUNG MEDAN**

2026

Hata Patujolo

Di na laho manomu-nomu 'Pekan Keluarga Keuskupan Agung Medan 2026', Komisi Keluarga KAM patupahon Buku Partangiangnan Lingkungan / Keluarga saleleng bulan Juli 2026. Tagam do roha nami asa dipangke buku partangiangnan on di ganup partangiangnan di saluhut lingkungan/keluarga di paroki-paroki na adong di keuskupan on.

Ia angka sipagasbagason na adong di buku partangiangnan on dipatupa do saguru tu tona ni Sinode Diosesan VII: **Manangihon, Patoguhon, Mamaritahon**. Songon Huria ruma tangga, tung mansai balga do panghorhon ni keluarga laho manggana haporseaon dohot hadirion ni nasa pangisina.

Mardongan girgir ni roha di hasadaon ni Huria Keuskupan Agung Medan, angka ruma tangga Katolik diarahon asa torus rap mardalan, marsileanan roha marsitangian, rap patoguhon ganup marsada-sada dibagasan holong ni Kristus, huhut mamaritahon tona ni Barita Nauli dibagasan parngoluon siganup ari.

Angka turpuk naung pinatupa tu 4 (opat) hali parpunguan lingkungan / keluarga ima:

1. Keluarga Rap Mardalan laho Marsitangian
2. Keluarga Rap Mardalan laho Marsipatoguoan
3. Keluarga Rap Mardalan laho Marsipasahatan Barita Nauli
4. Keluarga Katolik na Sinodal jala Marparange na Denggan

Medan, 1 Juli 2026

RP. Andreas Budianto, OFMConv

Ketua Komisi Keluarga KAM

PARPUNGUAN PARJOLO
KELUARGA RAP MARDALAN LAHO
MARSITANGIAN

1. Ende Pamungka

BETK No. 572

2. Tanda Silang

P. Dibagasan goar ni Ama, dohot Anak, dohot Tondi Porbadia.

R. Amen.

P. Sai anggiat ma holong dohot dame na sumurung na sian Debata Ama dohot Tuhanta, Jesus Kristus, mandongani hita saluhutna.

R. Saonari sahat rodi saleleng ni lelengna.

3. Hata Patujolo

Angka dongan na hinaholongan. Dibagasan pardalanan ni haporseaonta, tung jotjot do hita lalap mardalan dohot karejo, sampe lupa laho maradi satongkin huhut manangihon. Di ari on, marhite turiturian ni si Maria dohot si Marta, diarahon Tuhan do hita mangarimangi lapatan ni gabe "Keluarga na Manangihon".

Ditodo si Maria do hudul jonok simanjojak ni Tuhan huhut manangihon hata-Na. Diajarhon ibana do tu hita ia manangihon ndang holan mambege soara, alai mambuka roha laho manjakhon lomo ni rohani Debata. Buka hita ma roha dohot pingkiranta, asa marhite partangiangon on, lam tutu ma hita gabe ruma tangga na mangantusi dalan laho manangihon Tuhan, manangihon hita sama hita, huhut manangihon panjouon ni ngolunta.

4. Tangiang Pamungka

P. Martangiang ma hita,

Debata Ama Parasi Roha. Pujian dohot maulite hupasahat hami tu Ho ala ni holong dohot pangaramotion-Mu umbahen boi marpungu hami di ari on songon sada keluarga di lingkungan nami on. Saguru tu tona ni Sinode Keuskupan Agung Medan, girgir do roha nami laho rap mardalan dibagasan haporseaon. Saguru tu turiturian ni si Maria dohot si Marta, pasingot ma hami asa unang tarlalap mardalan manang karejo, alai sai rade patupahon tingki laho manangihon soara-M dibagasan tangiang dohot hata, huhut marsitangian hami sama hami mardongan roha holong na suksuk. Marhite-hite Tuhan nami Jesus Kristus, Anak-Mu, na mangolu jala marhuaso raphon Ho dibagasan hasadaon ni Tondi Porbadia, Debata, sahat rodi saleleng ni lelengna.

R. Amen.

5. Panjahaon Barita Nauli Lukas 10:38-42

P. Barita Nauli na pinatomu-tomu ni Nabadia Lukas.

R. Hamuliaon ma di Ho, ale Tuhan.

P. Jala di na mardalani Jesus dohot siseanna, dibongoti ma sada huta. Adong ma disi parompunan sahalak, na margoar si Marta, na manjangkon Ibana tu jabuna. Ianggo anggina na margoar si Maria, hundulhundul do di jolo ni Tuhan i tumangihon hatana. Diharonsothon si Marta do ragam ni parhobason. Laos dipajonok ma mandok: Tuhan, ndang diantoi roham, na pinasombu ni anggingki ahu marhobasi sahalakku? Dokkon ibana antong mandongani ahu!

Gabe ninna Tuhan i mangalusi ibana: O Marta, Marta! Lan do disarihon jala dihasusahon ho! Sada do na ringkot! Dipillit si Maria do tohap na uli i; ndang sibuaton i sian ibana.

P. Songon i ma Barita Nauli na pinatolhas tu hita sadari on.

R. Puji-pujian ma di Ho, ale Kristus.

6. Jamita

Akka dongan na hinaholongan, tona ni Sinode Keuskupan Agung Medan mangarahon hita laho rap mardalan, rap manangihon, rap patoguhon, jala rap mamaritahon holong ni Debata dibagasan parngoluon siganup ari. Keluarga do "Huria Nametmet" na gabe inganan na parjolo sahali diparmudu tona on. Marhite turiturian ni si Maria dohot si Marta, tarida do paltak ia dua turpuk ni ngolu na marhaporseaon, ima manangihon dohot manghobasi, ingkon do rap mardalan sauduran, ndang marsipasidingan. Sungkun-sungkun na jotjot haruar: Sala do si Marta siala ni parrohaonna i? Alusna ndang. Nandang salah si Marta i.

Ditomu-tomu si Marta do Jesus di bagasna sian roha na ias jala polin. Marsitutu do ibana marhobas asa boi pasahathon panghobasion na dumenggan tu Tuhan dohot tamuena i. Molo ndang dihobasi si Marta, ndang laho boi tupa sipanganon, jala haroro ni Jesus tu bagas nasida pe ndang boi dijakhon dohot denggan. Panghobasion ni si Marta i tung massai sangap jala porlu situtu.

Jadi, ndang karejo ni si Marta i na hurang dihalomohon Jesus, alai parrohaonna i do. Palomoshu, pabiarhu, jala paborathu do dipingkiri si Marta. Dibahen i gabe laos mago ma hadameon i sian ibana, ai nunga

gabe ditorui ibana anggina, jala dipinsang ibana muse ma Jesus. Alani ulaonna i, lupa do ibana tu Tuhan na hinobasina i na. Hape haroro-Na tu bagas nasida laho mamboan dame do, ndang boban.

Marhite tona ni Sinode na mangarahon hita rap mardalan laho manangihon, tohap ni si Maria dohot si Marta sabotulna ingkon marimbang, marsipasingkopian, jala marsitungkol-tungkolan do:

1. Tohap ni si Maria ima: Tingki laho "Maradi jala Manangihon".

On do bonana. Andorang so mula-ulaon, porlu do hita manangihon. Ditodo si Maria do hundul jonok tu simanjojak ni Jesus, manangihon hata-Na, huhut patupahon tondina parjolo sahali dipartamue Tuhan i. Dibagasan keluarga manang pungan Sinode, lapatanni on ima paradehon tingki laho martangiang, mangarimangi hata ni Tuhan, jala manangihon sahalak tu na asing mardongan roha na suksuk.

Tohapna: Ingkon gabe do bonana dohot unokna. Molo ndang alani on, panghobasionta gabe malos, maheu, jala mura taboan simor songon si Marta.

2. Tohap ni si Marta ima: Tingki laho "Mula Ulaon jala Manghobasi".

On ma parbue ni na manangihon. Molo dung rohanta be digohi holong ni Tuhan i, disuru do hita laho mamaritahon holong i marhiteambahenan na tarida. Si Marta patupahon ulaon di ruma tangga, ulaon di parkarejoan, jala panghobasion di tonga-tonga ni natorop.

Tohapna:

- a. Ingkon ditorushon dohot ulaon holong. Parhobasion na taulahon sian roha naung tinangihon ni Tuhan i, agia pe borat, ujungna gabe neang do hilalaon, gok las ni roha, jala ndang mangido balos.
- b. Nandang topet hita holan gabe "Maria" na hohom martangiang alai ndang parduli di angka porlu tu dongan jolma na male, na marsahit, manang na porlu pangurupion.
- c. Suang songon i ndang denggan hita molo holan gabe "Marta" na lalap holan na karejo sampe ndang hea mangalehon tingki laho martangiang, maradi, jala marsitangian sahalak tu na asing.

Keluarga na marparange na denggan ima keluarga na mangantusi andingan ingkon hundul hohom laho manangihon soara ni Tuhan jala soara ni dongan na mian di jabu i, jala diboto andingan ingkon hehe mula-ulaon laho manghobasi mardongan holong. Molo dos do na dua tohap on, gabe keluarga na pataridahon holong na pamalumhon ma hita, songon tona ni Sinodenta. Didok Jesus do, "Holan sada do na porlu". Na sasada i ima raphon dohot Ibana. Atik pe hita pas hundul manangihon songon si Maria, manang pas karejo songon si Marta, sude na i ingkon ma marurat marbona tu holong maradophon Tuhan i dohot dongan jolma.

Jadi, renta ma hita rap mardalan, rap marningot, rap marsiurupan, asa unang adong na manghilala manuhuk boban sasadasa. Tabahen ma tingki laho manangihon di simanjojak ni Tuhan i asa girgir rohanta laho manghobasi mardongan las ni roha.

Sai anggiat ma keluarganta dohot saluhut ruas ni Keuskupan Agung Medan on lam matoras laho mambahen dos ulaon manangihon dohot manghobasi, asa tarida tangkas bohi ni Huria na gok holong i.

7. Marbagi Naung Diulahon manang Dihilala (*Sharing*)

P. Saonari tapabagas ma muse jamita tongkin on dohot sungkun-sungkun na mangihut songon dalanta laho marbagi angka naung taulahon manang tahlilala.

1. Andigan ma tingki na dumenggan jala tonang tu keluarganta laho maradi satongkin huhut manangihon Tuhan marhite Buku Nabadia manang martangiang?
2. Tingki manang panghilalaan aha ma na jotjot mambahen hita maol manangihon pandapot manang holso ni donganta di keluarga?
3. Aha ma angka tanda na tahlilalahon molo manghatai Tuhan i tu hita manang diiring-iringi Ibana pardalanan ni ngolunta?

8. Siulahonon (Aksi Nyata)

P. Manontuhon tingki hohom manang manjaha Buku Nabadia hurang-lobi 5-10 minit ganup ari andorang mambonai manang mangujungi ulaon.

P. Mambahen ruhut: "Sahalak manghatai, na asing manangihon" uju manghatai manang padamehon parsoalan, ndang mamotong panghataion.

P. Ganup halak di keluarga marjanji laho tuminggil tu donganna marhite na olo manungkun: "Adong na boi huurupi?" manang "Boha panghilalaanmu sadari on?"

9. Tangiang Pangidoan

P. Dibagasan Kristus, tangkas do tarida holong ni Debata tu hita jolma. Alani i tama do hita pasahathon tangiang pangidoanta.

a. Tatangianghon ma angka parhalado ni Huria

Sai anggiat ma Amanta Debata mampargogoi haporseaon ni Amanta Uskup, angka Malim, Diakon, dohot saluhut parhalado ni ruas. Anggiat ma nasida gabe sitiruon na tinggil manangihon soara ni Tondi Porbadia dohot soara ni ruas naung dipasahat tu nasida, huhut margogo marmudu-mudu hita rap mardalan dibagasan hasadaon na togu.

Martangiang ma hita ...

b. Tatangianghon ma angka keluarga

Sai anggiat ma ganup ruma tangga nami be gabe “Huria Nametmet” na uli. Urupi ma hami asa unang holan mamingkiri diri nami sandiri, alai rade rap partupahon tingki, rap olo manangihon holso dohot las ni roha ni hami sama hami, jala rap olo manuhuk boban asa dame na sumurung-Mi tongtong mandongani hami.

Martangiang ma hita ...

c. Tatangianghon ma angka partogi ni bangso

Sai anggiat ma Tuhan mangalehon roha na bisuk jala toru tu Presiden, angka menteri, gubernur, bupati/wali kota, suang songon i saluhut partogi ni negara. Sai anggiat ma nasida tongtong rap mardalan dohot raiat, tinggil manangihon pangidoan dohot angka na porlu tu natorop, huhut pajolohon hadengganon tu saluhut, martimbanghon angka na porlu tu dirina manang angka donganna.

Martangiang ma hita ...

d. Tatangianghon ma angka pangidoan ni punguanta.

(Ditangianghon na martugas ma pangidoan naung dipasahat di bona ni parpungan on)

Martangiang ma hita ...

P. Nuaeng pe rap ma hita manangianghon "Tangiang Sionde Diosesan VII Keuskupan Agung Medan" (Hal 2)

10. Tangiang Ama Nami

P. Tapasada ma angka tangiang pangidoanta on dohot tangiang na niajarhon ni Jesus tu hita:

P+R Ama nami na di banua ginjang

11. Papungu Kolekte

BETK No. 588

12. Tangiang Panutup

P. Martangiang ma hita,

Debata Ama na Sun Denggan, mauiate ma ala nunga didongani Ho hami saleleng partangianghon on. Nunga dipaingot Ho hami marhite si Maria dohot si Marta taringot hinaporluni patupahon tingki laho manangiahon soaraM dohot soara ni angka dongan nami. Tuhan, pasu-pasu ma langka nami asa tongtong boi hami rap mardalan dibagasan holong. Urupi ma hami asa gabe keluarga na tinggil, sabar manangiahon, huhut rap marsiurupan, asa dameM na sumurung i tongtong mandongani ruma tangga nami be. Marhite-hite Kristus, Tuhan nami.

R. Amen.

(Boi muse do ditangianghon tangiang tu keluarga: BETK No.)

13. Mangido Pasu-Pasu

P. Tuhan i mandongani hita.

R. Saonari dohot rodi saleleng ni lelengna.

P. Sai anggiat ma Debata na Marhabangsa mampargogoi, mandongani, jala mamasumasu hita asa gabe rap olo manangihon hita sama hita, dibagasan goar ni Ama, dohot Anak, dohot Tondi Porbadia.

R. Amen.

P. Angka dongan na hinaholongan, nuaeng pe partangianganta na parjolo taringot tu Ruas ni Katolik na Rap Mardalan laho Marsitangian nunga sun be.

R. Mauliate ma di Debata.

14. Ende Panutup

BETK No. 606

PARPUNGUAN PADUAHON

KELUARGA RAP MARDALAN LAHO MARSIPATOGUAN

1. Ende Pamungka

BETK No. 573 :

2. Tanda Silang

P. Dibagasan Goar ni Ama, dohot Anak, dohot Tondi Porbadia.

R. Amen.

P. Sai anggiat ma holong dohot dame na sumurung na sian Debata Ama dohot Tuhanta, Jesus Kristus, mandongani hita saluhutna.

R. Saonari sahat rodi saleleng ni lelengna.

3. Hata Patujolo

Tapuji jala mauliate ma tapasahat tu Debata Ama na Sun Denggan i. Di ari on, dijou do hita laho marpungu ndang marsahalak-sahalak manang pulik-pulik, alai sada keluarga nabolon do hita, ima ruas ni Debata. Di partangiangana na parjolo nunga tarimangi: **"Keluarga na Rap Mardalan laho Marsitangian"**. Sai anggiat ma hita sude boi mangulahonsa dohot denggan, ima na manangihon soara ni damang, dainang, dohot angka ianakhonta, tarlumobi ma soara na ro sian Tuhan i. Saonari pe di partangianganta tingki on tapabagas ma muse: **"Ruas ni Katolik na Rap Madalan laho Marsipatoguan"**.

Dibagasan pardalanan ni haporseaonta, ra jotjot do tahlalahon loja, lomos, manang sasada hita mangadopi angka abat-abat. Alai, dipaingot hata ni Tuhan i do hita

ia hita on ganup marsada-sada do daging ni Kristus i. Hita ndang mardalan pulik-pulik. Alain rap mardalan do hita, rap marsitiopan tangan, rap marsipatoguan, jala rap marsitungkolan. Molo adong na gale, dongan na gogo ma manungkol. Uju adong na mandele, dongan na asing mangalehon panghirimon. Sai anggiat ma marhite partangiangnan keluarga on, lam dipasada rohanta, lam dipatogu haporseaonta, huhut tasadari ma na marhahamaranggi do hita, jala rap manghaporluhon do hita sama hita laho pamuliahon goarni Tuhan i. Buhai hita ma roha dohot pingkiranta laho manomu-nomu ulaon holong-Na di tingki on.

4. Tangiang Pamungka

P. Martangiang ma hita,

Debata Ama Parasi Roha, mauliate ma di Ho ala dipapungu Ho do hami di son gabe sada keluarga ni ruas Katolik. Ndang ditompa Ho hami laho mangolu pulik-pulik, alai laho mangolu dibagasan hasadaon dohot holong. Tuhan Jesus, Ho do dalan na tutu. Di ari on, ro do hami tu Ho mardongan tona: "Rap Mardalan laho Marsipatoguan". Patogu ma roha nami asa husadari hami na martondong do hami. Lehon ma di hami sipareon na tinggil laho marsilehonan roha, tangan na rade marsiurupan, dohot angka hata na boi marsipatoguan. Di tonga-tonga ni portibi na gok parsorion on, unang pasombu hami mardalan sasada hami. Pasada ma langka nami, patogu pardonganon nami asa marhite haporseaon na togu boi hami rap mangalangka pareakhon Ho. Hupangido hami, pasu-pasu ma partangiangnan keluarga on. Papolin ma roha dohot

pingkiran nami, asa saluhut na huula jala huhatahon hami sadari on gabe pasu-pasu tu dongan jala gabe somba na suman tu Ho. Marhite-hite Tuhan nami, Jesus Kristus, Anak-Mi, na mangolu jala marhuasoraphon Ho dibagasan sahadaon dohot Tondi Porbadia, Debata saleleng ni lelengna.

Q. Amen.

5. Panjahaon Barita Nauli Johannes 20:19-23

P. Barita Nauli na pinatomu-tomu ni Nabadia Johannes.

R. Hamuliaon ma di Ho, ale Tuhan.

P. Jadi dung bot ari, di ari parjolo dung salpu ari Sabbath, di naung sordak angka pintu ni inganan ni angka sisean i, ala ni biar ni rohanasida mida angka Jahudi, ro ma Jesus jongjong tu tongatonganasida, jadi didok ma tu nasida: Dame ma di hamu! Jadi dung didok songon i, dipatuduhon ma tanganna dohot andorana tu nasida, gabe las ma roha ni angka sisean i, ala naung diida nasida Tuhan i. Dung i diulahi Jesus ma mandok tu nasida: Dame ma di hamu! Songon sinuru ni Ama i Ahu, suruonku hamu. Jadi dung didok songon i, mangombus ma Ibana dompak nasida, huhut ma didok: Jalo hamu ma Tondi Parbadia! Molo disesa hamu dosa ni manang ise, naung sesa ma i; molo dipahot hamu dosa ni manang ise, hot do i.

P. Songon i ma Barita Nauli na pinatolhas tu hita sadari on.

R. Puji-pujian ma di Ho, ale Kristus.

6. Jamita

Dibagasan panjahaon Barita Nauli tongkin on, tabereng do aha na masa tu angka panurirang di borngin na parjolo dung hehe Jesus sian na mate. Marpungu do nasida di sada bagas jala pintu dihunsi mansai gomos. Boasa? Ala mabiar nasida. Tarpinjil do dihilala nasida, gale, jala lomos. Panghilalaan nasida nunga ditadinghon jala tarsosak. Alai aha na masa? Ro do Jesus jala jongjong di tonga-tonga nasida. Ro Jesus ndang laho manorui, alai laho pasahathon dame jala patoguhon roha.

Adong tolu tona na paltak sian panjahoan tongkin on na domu tu sipabagasonta: ”Rap Mardalan laho Marsipatoguan” ima:

1. Dibagasan hasadoan do hagagoon i tupa

Nandang borhat angka panurirang i manang tu dia pe pulik-pulik. Marpungu do nasida. Nangpe mabiar nasida, alai hasadaon i do gabe inganan na mambahen roha nasida menak. Songon ido nang hita ruas ni Huria i. Nandang dijou hita laho mandalani haporseaonta pulik-pulik. Molo rap mardalan hita di ngolunta, boban i pe gabe neang do hilalaonta, jala roha na mabiar boi muba gabe roha na barani.

2. Dibagasan hasadaonta do Jesus i mian

Didok Jesus do, “Dame ma di hamu!” Molo sada do rohanta jala olo marpungu, mian do Jesus i di tonga-tonganta. Ro do Ibana laho pamagohon biar ni rohanta, mangganti roha na mandele dohot roha na manghirim, jala mangombushon Tondi Porbadia-Na asa margogo hita. Haporseaonta dipatogu ndang holan alani tangiangta sandiri, alai ala na tahlalalon do Tuhan i mian di hasadaon dohot angka donganta.

3. Disuru do hita laho marsipatoguan

Dung dipasahat dame-Na, didok Jesus do muse, “Songon sinuru ni Ama i Ahu, suruonku do hamu”. Dung i diombushon Ibana Tondi Porbadia dompak nasida. Lapatanna, hagagoon na tajalo sian Tuhan i ndang boi tapeop holan tu dirinta sandiri. Dijou do hita laho gabe ’tangan dohot pat’ ni Jesus tu donganta na asing. Molo adong donganta na gale, hita na adong gogo ikkon manungkolsa. Molo adong na lomos, ikkon talean do pos ni roha. Molo adong na gadap, taurupi nasida asa boi hehe. Rap marsisesaan sala ma hita, rap manjakhon hita sama hita, songon naung binahen ni Tuhan i tu hita.

7. **Marbagi Naung Diulahon manang Dihilala (*Sharing*)**

P. Saonari tapabagas ma muse jamita naung tatangihon tongkin on dohot sungkun-sungkun na mangihut songon dalanta laho marbagi angka naung taulahon manang tahlalahon:

1. Andigan ma parpudi sahali dihilalahon hamu na diparrohahon manang dipargogoi donganmu sajabu hamu? Aha ma didok mamang diulahon nasida tu hamu?
2. Angka aha ma (hata manang parrohaon) na jotjot ndang sangaja tahatahon/taulahon, alai gabe patubuhon hassit ni roha manang pagalehon hasadaon ni keluarga?
3. Molo adong donganta sajabu na marsala manang ditipa parungkilon, songon dia parrohaon na topet bahenonta saguru tu ajar-ajar ni Tuhan i?

8. Siulahonon (Aksi Nyata)

- P.** Pauba panghataion: Mangganti hata manorui/hata na kasar dohot hata pangidoan na padengganhon (Rupani: Unang be mandok ”Torus sala, torus sala”, alai ganti ma gabe “Talului ma ate dalan na asing jala na dumenggan”).
- P.** Mambahen hasomalan “Sada Pujian Ganup Ari”: Ganup jolma na adong di keluarga i ikkon mamuji manang pajagarhon na denggan na binahen ni donganna na asing ganup ari.
- P.** Marjanji laho marsitangian be, ndang holan taringot tu angka naung somal, alai manangianghon angka ulaon, abat-abat, parjuangan, parungkilon, dohot lan na asing na pas diadopi nasida be.

9. Tangiang Pangidoan dohot Tangiang Sinode

- P.** Dibagasan Kristus, tangkas do tarida holong ni Debata tu hita jolma. Jala ditagam Ibana do asa rade rohanta laho marsitangian. Alani i tama do hita pasahathon tangiang pangidoanta.

a. Tatangianhon ma parhalado ni Hurianta

Ale Amang, mauliate ma di Ho ala diparrohahon jala dipargogoi angka parhalado ni Huria-Mi do hami. Lehon ma di nasida Tondi Parbisuk i asa boi dipataridahon nasida Kristus di tonga-tonga ni portibi on jala lam didasdasi ruas i laho jumadihon hata-M gabe unok ni ngoluna be di portibi on. Martangiang ma hita ...

b. Tatangianghon ma partogi ni negara

Ale Amang, dongani ma partogi ni negara nami di sude angka ulaon nasida laho manghobasi negara nami on. Pasu-pasu nasida asa boi manguluhon

mardongan bisuk, toru ni roha, jala roha na girgir laho manghobasi. Lehon ma di nasida roha na rade laho manghophop masarakat, ala ido gabe sitindangi ni haporseoan nasida di holong-Mu na paluahon i.

Martangiang ma hita ...

c. Tatangianghon ma angka parbarita nauli, guru agama, dohot katekis

Ale Amang, mauliate ma di Ho ala panjouon ni parbarita nauli, guru agama, dohot katekis na rade mamelehon ngolu nasida laho mamaritahon Barita Nauli dohot mangajar-ajari ruas-Mi. Lehon ma tu angka parbarita nauli bisuk asa dihalalahon nasida Tondi-Mi na mangula jala mangkuling di ate-ate ni angka jolma na mangalului hasintongan. Pargogoi ma ulaon dohot diri nasida tingki mamaritahon hasadaon dohot panindangion ni haporseaon di nasa gulmit ni parngoluon siganup ari.

Martangiang ma hita...

d. Tatangianghon ma hita na pungu di son

Ale Amang, pasu-pasu ma hami ruas-Mu naung pungu di son laho mamaritahon holong-Mu na paluahon ganup jolma. Togu-togu ma hami asa tongtong mangolu saguru tu hataM sandiri jala pargogoi ma hami asa marsipatoguon sahalak tu na asing.

Martangiang ma hita ...

e. Tatangianghon ma angka pangidoan ni punguanta.

(Ditangianghon na martugas ma pangidoan naung dipasahat di bona ni parpunguan on)

Martangiang ma hita ...

P. Nuaeng pe rap hita hita manangianghon ”Tangiang Sinode Disosesan VII Keuskupan Agung Medan”.
(Hal 2)

10. Tangiang Ama Nami

P. Tapasada ma angka tangiang pangidoanta i dohot tangiang na niajarhon Jesus sandiri.

P+R Ama Nami na di banua ginjang ...

11. Papungu Kolekte

BETK No 586

12. Tangiang Panimpuli

P. Martangiang ma hita,

Debata Ama na marhabangsa di banua ginjang jala gok hamuliaon, hami ruas-Mu mandok mauliate tu Ho alana tongtong do Ho mian huhut mandongani hami dibagasan partangiangon on. Urupi ma hami asa parbue ni partangiangon on tangkas tarida dibagasan parngoluon nami marhite na marsipatoguan hami sama hami dibagasan angka ulaon holong ni roha songon naung niajarhon ni Anak-Mi. Dongani ma hami tongtong asa burju mangulahon lomo ni rohaM. Hupasahat hami on tu Ho marhite-hite Kristus, Tuhan nami.

R. Amen.

13. Mangido Pasu-pasu

P. Tuhan i mandongani hita.

R. Saonari sahat rodi saleleng ni lelengna.

P. Sai anggiat ma Debata na Marhuaso i mampargogi, mandongai, jala mamasu-masu hita asa marsipatoguan sahalak tu na asing, dibagasan goar ni Ama, dohot Anak, dohot Tondi Porbadia.

R. Amen.

P. Angka dongan na hinaholongan, nuaeng pe partangianganta na paduahon taringot tu 'Ruas ni Katolik na Rap Mardalan laho Marsipatoguan' nunga sun ben.

R. Mauliate ma di Debata.

14. Ende Panutup

PS No. 616

PARPUNGUAN PATOLUHON

KELUARGA RAP MARDALAN LAHO MARSIPATOLHASAN BARITA NAULI

1. Ende Pamungka

BETK No. 574

2. Tanda Silang

P. Dibagasan goar ni Ama, dohot Anak, dohot Tondi Porbadia.

R. Amen.

P. Sai anggiat ma holong dohot dame na sumurung na sian Debata Ama dohot Tuhanta, Jesus Kristus, mandongani hita saluhutna.

R. Saonari sahat rodi saleleng ni lelengna.

3. Hata Patujolo

P. Angka dongan na hinaholongan, di parpunguan na patoluhon on, naeng dibohali do hita marhite ondolan on: “Keluarga Rap Mardalan laho Marsipatolhasan Barita Nauli”. Songon sada Huria na metmet (*ecclesia domestica*), balga do panghorhonni keluarga gabe inganan na parjolo laho hatubuan ni haporseaon, holong, dohot angka poda ni hakristenon. Dibagasan parngoluon na lam maju huhut gok parungkilon, keluarga Katolik dijou asa rap mardalan, marsipatoguan, huhut mamaritahon holong ni Debata dibagasan parngoluon siganup ari. Marhite partangiang on, diparbaga do angka ruma tangga ni Katolik asa lam dipatogu di parngoluon ni tangiang, dipasada dibagasan holong, huhut didasdasasi laho mamaritahon Barita Nauli, di

tonga-tonga ni keluarga suang songon i di tonga-tonga ni masarakat. Partangianan di keluarga gabe dalan na metmet alai marimpola laho papatarhon na mangolu do Tuhan i di ganup gulmit ni parngoluon ni keluarga.

4. Tangiang Pamungka

P. Martangiang ma hita,

Debata Ama na Gok Holong, mauiliate ma di Ho alani keluarga naung nilehon-Mu tu hami. Dijou Ho do hami laho rap mardalan dibagasan holong, marsitungkol-tungkolan, jala marbungaran dibagasan haporseaon tu Ho. Iring-iring ma hami, ale Amang, asa dibagasan hasadaon ni keluarga, tolap hami marsipatoguan dohot marsipatolhasan holong-Mu marhite panghataion dohot parniulaan nami siganup ari. Ajari ma hami asa burju martangiang, renta roha nami laho manghobasi, huhut gok holong di na mangadopi saluhut gulmit ni parngoluon on. Usehon ma Tondi Porbadia-Mi tu hami asa ganup keluarga nami gabe tanda na mangolu do Ho di diri nami, gabe sinondang dohot sira tu dongan nami, huhut girgir mandalanhon panjouon nami laho mamaritahon Barita Nauli. Marhite-hite Tuhan nami, Jesus Kristus, Anak-Mu, na mangolu jala marhuaso raphon Ho dibagasan hasadaon ni Tondi Porbadia, Debata, sahat rodi saleleng ni lelengna.

R. Amen.

5. Panjahaon Barita Nauli Mateus 28:16-20

P. Barita Nauli na pinatomu-tomu ni Nabadia Mateus.

R. Hamuliaon ma di Ho, ale Tuhan.

P. Alai na laho do anggo siseanna na sampulusada i tu sada dolok na di luat Galilea, songon naung tinonahon ni Jesus tu nasida. Jadi dung diida nasida Ibana, disomba ma Ibana; alai na ganggu do roha ni na deba. Dung i didapothon Jesus ma nasida, didok ma: Nunga sahat tu Ahu nasa huaso na di banua ginjang dohot na di tano on. Laho ma hamu, podai hamu ma saluhut bangso, didi hamu ma nasida tubagasan Goar ni Ama. Anak dohot Tondi Parbadia! Laos ajari hamu ma nasida mangaradoti nasa hata naung hupatikkon tu hamu. Ai ida ma, sai na dongananku do hamu ganup ari, rasirasa ro ajal ni hasiangan on!

P. Songon i ma Barita Nauli na pinatolhas tu hita sadari on.

R. Puji-pujian ma di Ho, ale Kristus.

6. Jamita

Angka dongan na hinaholongan, Barita Nauli naung tatangihon tongkin on patolhashon tu hita na masa tu angka sisean ni Jesus, ima na disuru nasida gabe parbarita tu liat portibi on. Porlu taparrohahon, uju angka sisean i marnida Jesus nunga hehe, disomba nasida ma Ibana, alai na deba ganggu do rohana. On pasahathon tu hita ia haporseaon i ndang torus mardalan dohot denggan. Gari angka sisean i pe ganggu do rohana.

Alai, ndang manjua manang mandao Jesus sian nasida na ganggu i. Baliksa tahe, dijonohi Ibana do nasida. On ma holong ni Tuhan i: apala topet dibagasan hagaleon

dohot ganggu ni rohanta i do Ibana rade. Sian i marsiajar hita ia Tuhanta ndang mangido hita pintor mauliutus, alai haradeon ni rohanta i do laho porsea jala rade mardalan raphon Ibana.

Dung i dilehon Jesus ma parenta na mansai torang ima gabe suruan: "Laho ma hamu, jadihon hamu saluhut bangso gabe sisean-Hu." Ndang holan tu angka sisean na uju i Jesus pasahathon parenta on, alai dohot do tu hita sude, ndang hatinggalan angka keluarga Katolik nuaeng on. Dijou do keluarganta gabe inganan na parjolo sahali laho parbarita haporseaoan, inganan ni holong, dohot hasesaan ni sala, suang songon i haporseaon tu Tuhan i diajarhon huhut diparngoluhon ganup ari; alana keluarga i do sikkola na parjolo tu angka ianakhon dohot natorasna.

Jotjot do ra hita marpikikir molo mamaritahon Barita Nauli i ikkon laho dao tu luat sileban, manang marhite ulaon na jago. Hape, ulaon marbarita na tung mansai tangkas sasintongna dibuhai sian angka na metmet: marsihaholongan, marsitangiang, rap martangiang, jala patuduhon parngoluon na suman gabe sitiruon di tonga-tonga ni keluarga.

Dijanjihon Jesus do muse tu hita sada sitiopon na pabalga rohanta ima: "Na dongananku do hamu ganup ari, rasirasa ro ajal ni hasiangan on." Lapatanni on, ndang be sasada hita mangulahon parenta dohot ulaon na sangap on. Di sude angka pambahenanta laho mangolu dibagasan holong huhut mamaritahon na denggan, atik pe metmet, didongani Tuhan i do hita tongtong.

Sai anggiat ma marhite hata ni Tuhan naung tatangihon tongkin on, hita angka keluarga Katolik lam

dipargogoi laho rap mardalan, marsitungkolan, huhut lam barani mamaritahon holong ni Kristus i dibagasan parngoluonta siganup ari.

7. Marbagi Naung Diulahon manang Dihilala (*Sharing*)

P. Saonari tapabagas ma jamita tongkin on marhite sungkun-sungkun na mangihut songon dalanta marbagi angka naung taulahon manang tahlala.

1. Saguru tu hamu, aha do lapatanni "mamaritahon" dibagasan parngoluonta siganup ari?
2. Angka aha ma naung diulahon hamu di keluarga laho mamaritahon dame dohot holong ni Kristus i?
3. Nunga be tahe gabe sada hasomalan di keluarganta be rap mangan, martangiang, dohot manjaha Buku Nabadia?
4. Aha ma abat-abat naumbalga na tahlalahon tingki mamaritahon holong Kristus i?

8. Siulahonon (Aksi Nyata)

P. Rap mardalan dibagasan haporseaon marhite tangiang na manghorhon gogo laho mamaritahon.

Suman tu angka sisean na ro tu Jesus, keluarga pe dijou do asa tongtong ro tu Tuhan i marhite na rap martangiang. Sian tangiang i ma keluarga dapotan gogo laho mangulahon parenta: "Laho ma, laos bahen hamu ma saluhut bangso gabe sisean-Ku." Nuaeng pe tangkas ma tu hita, tangiang i do mual ni nasa ulaon laho mamaritahon holong ni Tuhan i.

P. Mamaritahon marhite ngolu siganup ari atik pe adong hagaleon dohot ganggu ni roha.

Tong do disuru angka sisean i atik pe ganggu roha nasida. Songon i do nang keluarga, tong do dijou laho mamaritahon Barita Nauli marhite na

manghaholongi, rade manesa sala ni angka parsala, jala mangalehon roha. Dibagasan ngolu siganup ari, keluarga gabe sitindangi ni Kristus i marhite parniulaan na patar, huhut porsea tu janji-Na: "Sai na donganan-Ku do hamu tongtong".

9. Tangiang Pangidoan

P. Dibagasan Kristus, tangkas do tarida holong ni Debata tu hita jolma. Jala ditagam Ibana do asa rade rohanta laho mamaritahon holong-Na. Alani i tama do hita pasahathon tangiang pangidoanta.

1. Tatangianhon ma parhalado ni Hurianta,

Ale Amang na Sunburju, hutangianghon hami Amanta Paus, angka Uskup, Pastor, dohot sude parhobas ni Huria. Usehon ma Tondi Porbadia-Mi tu nasida asa tongtong marsihohot di panjouon nasida gabe parmahan ni ruas-Mi. Patogu ma haporseaon nasida, songon i nang panghirimon nasida, jala gohi ma nasida dohot holong di panghobasion nasida. Sai anggiat ma nasida gabe sitiruon ni ruas asa ruas i lam dipatogu huhut dipasada dibagasan holong ni Kristus.

Martangiang ma hita...

2. Tatangianghon ma partogi ni negara dohot angka sibahen uhum,

Ale Amang na Sunburju, hutangianghon hami do angka partogi ni negara dohot sibahen uhum. Lehon ma di nasida bisuk, tigor ni pingkiran, dohot roha na ias jala bonar asa boi mandalanhon ulaon nasida dohot denggan, tigor, pajolohon hadumaon ni raiat, jala mangaradoti hasadaon dohot hadameon.

Martangiang ma hita ...

3. Tatangianghon ma angka Parbarita Nauli,

Ale Amang Pardenggan Basa, hutangianghon hami do angka Parbarita Nauli, angka misionaris dohot halak na porsea jala pararat hata-Mi. Pargogoi ma nasida dohot Tondi Porbadia-Mi asa daulat di ulaon i, barani mangadopi abat-abat, jala padot mamaritahon holong ni Kristus marhite pangkataion dohot parniulaan.

Martangiang ma hita ...

4. **Tatangianghon ma hita na pungu di son,**

Ale Amang Nabasa, patogu ma haporseaon nami na pungu nuaeng di son, pasada ma hami dibagasan holong, jala urupi ma hami asa tongtong mangolu saguru tu lomo ni rohaM, huhut barani mamaritahon holong ni Kristus i dibagasan parngoluon nami siganup ari.

Martangiang ma hita ...

5. **Tatangianghon ma pangidoan ni lingkunganta on**

...

(Ditangianghon na martugas ma pangidoan naung dipasahat di bona ni parpunguan on)

Martangiang ma hita ...

- P. Saonari pe rap ma hita manangianghon tangiang "Sinode Diosesan VII Keuskupan Agung Medan".
(Hal 2)

10. **Tangiang Ama Nami**

- P. Tapasada ma angka tangiang pangidoanta dohot tangiang na niajarhon ni Tuhan Jesus sandiri tu hita.

P+R Ama Nami na di banua ginjang ...

11. **Papungu Kolekte**

BETK No. 586

12. **Tangiang Panimpuli**

- P. Martangiang ma hita,

Debata Ama Parholong Roha, huhamauliatehon hami do hasadaon nami di partangiangnan on. Nunga

hutangihon hami be Hata-Mi jala angka tangiang nami pe nunga hupasahat hami tu Ho. Sai anggiat ma dipatogu Ho haporseaon nami, dipasada Ho hami dibagasan holong, jala dipargogoi Ho hami laho mangulahon panjouon nami songon keluarga na rap mardalan laho mamaritahon holong-Mi di parngoluon nami siganup ari. Dongani ma hami di saluhut gulmit ni parngoluon nami, asa aha naung hureahon hami tikki on tutu situtu diparngoluhon hami marhite parniulaan na tarida. Marhite-hite Kristus, Tuhan nami.

R. Amen.

13. Mangido Pasu-pasu

P. Tahan i mandongani hita.

R. Saonari dohot rodi saleleng ni lelengna.

P. Sai anggiat ma Debata na Marhuaso mampargogoi, mangiringiring, jala mamasumasu hita laho marsipatolhasan Barita Nauli tu hita sama hita, dibagasan goar ni Ama, dohot Anak, dohot Tondi Porbadia.

R. Amen.

P. Angka dongan na hinaholongan, nuaeng pe partangianganta na patoluhon taringot tu ruas ni Katolik na rap mardalan laho marsipatolhasan Barita Nauli nunga be sun.

R. Mauliate ma di Debata.

14. Ende Panutup

BETK No. 577

PARPUNGUAN PAOPATHON

KELUARGA KATOLIK NA SINODAL HUHUT MARPARANGE NA DENGGAN

1. Ende Pamungka

BETK NO. 580

2. Tanda Silang

P. Dibagasan goar ni Ama, dohot Anak, dohot Tondi Porbadia.

R. Amen.

P. Sai anggiat ma holong dohot dame na sumurung na sian Debata Ama dohot Tuhanta, Jesus Kristus, mandongani hita.

R. Saonari sahat rodi saleleng ni lelengna.

3. Hata Patujolo

Angka dongan na hinaholongan dibagasan Kristus, marpungu do hita muse di tikki on laho manguduti partangianganta. On ma parpunguanta na paopathon. Andorang so tatorushon, husukkun hami ma jolo hita muse. Diingot hamu dope tahe aha na tahatai manang tabahas di partangiangangan na parjolo, paduahon, dohot patulohon? (*Denggan ma dilehon piga-piga halak mambahen alus*) Mauliate ma di hita. Ia partangianganta na paopathon on ima taringot tu: KELUARGA KATOLIK NA SINODAL HUHUT MARPARANGE NA DENGGAN. On ma impola ni saluhut panghataionta di partangiangangan bulan keluarga on.

Keluarga Katolik na sinodal huhut marparange na denggan ima keluarga na rap mardalan laho marsitangian tu dongan jolma dohot soara ni Tuhan, keluarga na

marsipatoguon di sude gulmit parngoluon na sorat manang gale, jala keluarga na girgir mamaritahon panindangion ni dirina saguru tu hata ni Tuhan i, suang songon i keluarga na mambahen ruhut-ruhut na topet tu sudejolma na adong di keluarga.

Marhite panghataionta sadari on, diparbaga do saluhut ruas ni Katolik di Keuskupan Agung Medan on gabe keluarga na manghangoluhon hata ni Barita Nauli, asa boi mamaritahon panindangion parngoluonna songon halak naporsea dibagasan parngoluon siganup ari.

4. Tangiang Pamungka

P. Martangiang ma hita,

Debata Ama na gok holong, nunga dijou Ho hami asa mangolu hami dibagasan keluarga na marsada jala marsihaholongan. Usehon ma Tondi Porbadia i tu hami, asa boi hupatupa hami parbue ni Tondi i dibagasan parngoluon nami ima: holong, las ni roha, dame, lambas ni roha, dohot hatomanon. Togu-togu ma hami asa gabe keluarga na sinodal huhut marparange na denggan na rap mardalan dibagasan sinondang ni holong-Mu. Marhite-hite Tuhan nami, Jesus Kristus, Anak-Mu, na mangolu jala marhuaso raphon Ho dibagasan hasadaon ni Tondi Porbadia, Debata, saleleng ni lelengna.

5. Panjahaon Galatia 5:16-26

P. Panjahaon sian Surat ni Apostel Paulus tu Huria Galatia.

Alai on do hudok: Marguru tu Tondi i ma hamu marparange; unang pasaut hamu hisaphisap ni daging! Ai na maralohon tondi do sangkapsangkap

ni daging, jala maralohon daging i do sinangkap ni tondi: Na masialoan do i, asa unang dipasaut hamu pinangido ni rohamuna. Alai molo ditogihon Tondi i hamu, ndang ginomgoman ni patik hamu. Alai tandap do parulaon ni daging, i ma parmainanon, hahodaron, pargadombuson, hasipelebeguon, hadatuon, parmuseumusun, parbadabadaon, pangiburuon, rimasrimas, pargutugutuon, parsalisian, partahitahion, bunubunu, parmabuhon, haormuson jala angka na suman tusi. Naung hupaboa najolo tu hamu, songon i do nang nuaeng: Ndang teanon ni angka na mangulahon sisongon i harajaon ni Debata. Alai angka on do parbue ni Tondi: Holong dohot las ni roha, dame dohot lambas ni roha, habasaron, habasaon, haporseaon, halambohon dohot hatomanon. Ndang maralo patik dompak angka sisongon i. Alai angka na ginomgoman ni Kristus Jesus, diparsilangkong do dagingna rap dohot angka hisaphisap dohot sangkapsangkap. Ia dung dipangolu Tondi i hita, taparangehon ma Tondi i! Unang ma taehi hasangapon na rumar; unang masiasapan manang masilatean!

P. Songon i ma hata ni Tuhan.

R. Mauliate ma di Debata.

6. Jamita

Angka dongan dohot keluarga na hinaholongan. Keluarga do sikkola na parjolo jala na sumurung laho inganan mangalehon parsiajangan marparange na denggan tu angka dakdanak. Molo keluarga do parsikkolaan, tontu sahali natua-tua ma gabe guruna. (Domu do on tu

Tolu Tohonan ni Natua-tua, ima songon sahalak Guru, Malim, dohot Parmahan). Songon sahalak guru di keluarga, tontu sahali natua-tua ndang holan mangajari angka ianakhonna marparange na denggan, alai dohot do mangajarhon angka impola ni haporseaon.

Angka impola ni haporseaon na laho memehonon tu angka dakdanak ima hata ni Debata naung tatangihon tongkin on na nienet sian Surat ni Apostel Paulus tu Huria Galatia 5:16-26, tarlumobi ma di ayat 22-23, ima: "Alai angka on do parbue ni Tondi: holong, las ni roha, dame, lambas ni roha, habasaron, habasaon, haporseaon, halambohon, dohot hatomanon".

Dipaingot hata ni Tuhan i do hita tingki on. Marparbue na uli do antong keluarga na mangolu dibagasan Tondi Porbadia. Tota do didok Hata i, parbue ni Tondi i ima sia parange na ikkon diparngoluhon halak na niuluhon ni Tondi. Dilehon ayat i gombaran tu hita, ia parange ni Kristus i ndang holan uhum manang ulaon haportibion, alai tutu situtu do halak na porsea muba alani Tondi i. Parbue ni Tondi i mangajarhon tu hita ia parange na denggan situtu ndang masa alani uhum manang digogohon halak, alai alani haporseaon na mangolu tu Tuhan i.

Hata ni Tuhan on gabe 'tungkot di na landit jala sulu di na golap' tu keluarga Katolik na marparange na denggan. Alani i, boi ma dohonon, ia keluarga Katolik na sinodal jala marparange na denggan ima keluarga Katolik na rade marsitangian, rade manangihon soara ni Tuhan i, marsipatoguon dohot dongan uju gale, jala tangkas tarida impola ni haporseaon i dibaritahon dibagasan parngoluwonna, huhut manghangoluhon parbue

ni Tondi i, laos adong ruhutruhut marpangalaho naung ditolopi sude halak na adong di keluarga i, jala boi gabe tudosan tu keluarga na asing. Molo pinatorang muse, keluarga na marparange na denggan ima: sinonduk na marparange na denggan, parsonduk na marparange na denggan, ianakhon na marparange na denggan, jala jabu na mangurupi angka pangisina gabe marparange na denggan.

7. Marbagi Naung Diulahon manang Dihilala (*Sharing*)

P. Angka dongan, nuaeng pe tapabagas ma muse jamita tongkin on marhite na manurinurihon aha naung taulahon manang tahlala saguru tu sungkun-sungkun on.

1. Dia do parbue ni Tondi na ummaol taulahon di ruma tangganta be?
2. Aha do abat-abat na umbalga di hita laho padimundimun hasadaron manang harentaon ni keluarganta?
3. Songon dia do pangalaho ni: sinonduk na marparange na denggan, parsonduk na marparange na denggan, dohot ianakhon na marparange na denggan?
4. Aha ma hasomalan na metmet na boi torus diulahon asa gabe keluarga na marparange na denggan?

8. Siulahonon (*Aksi Nyata*)

P. Dung manghata-hata hita taringot tu keluarga na marparange na denggan on, tabaen ma sada-dua sangkap na tutu situtu boi taulahon, jala sintong ingkon taulahon. Aha ma i? Rupani:

1. Adong jadual tangiang keluarga.
2. Adong ruhutruhut marpangalaho di keluarga.

3. Adong dibahen marbagi ulaon di jabu tu sude
jolma na mian di keluarga i.

4. Dohot lan na asing.

9. Tangiang Pangidoan dohot Tangiang Sinode

P. Dihalomohon Debata do hita asa lam marparange na
denggan. Alani tama do hita pasahathon tangiang
pangidoanta.

a. Tatangiangan ma parhadalo ni Huria

Ale Amang Nabasa, mauliate ma di Ho ala ni angka
parhadalo ni Huria nami naung mamelehon dirina
laho manghobasi ruas-Mi. Parbadiai ma nasida
dohot parbue ni Tondi i asa lam margogo laho
mamaritahon holong-Mi dibagasan uloa nasida,
jala laos gabe sitiruon di hami ruas.

Martangiang ma hita ...

b. Tatangiangan ma partogi ni bangso

Ale Amang na Gok Bisuk, usehon ma Tondi
Parbisuk na sian Ho tu angka partogi ni bangso nami
asa tongtong mulaulaon pajolohon hadumaon dohot
hatigoran tu saluhut raiat. Jala lehon ma tu nasida
lambas ni roha asa rade marungkil laho patupahon
hamajuon ni bangso dohot negara nami.

Martangiang ma hita ...

c. Tatangiangan ma keluarga

Ale Amang Mual ni Nasa Nauli Nadenggan, pasu-
pasu ma saluhut keluarga na adong di lingkungan
nami on. Togu-togu ma hami asa margogo laho
marsitangiang, marsipatoguan, dohot
mamaritahon, huhut laos manghangoluhon angka
parbue ni Tondi-Mi, asa gabe angka keluarga na

marparange na denggan hami jala gabe sitiruon tu angka keluarga na adong humaliang hami.

Martangiang ma hita ...

d. Tatangianghon ma pangidoan ni lingkunganta on

...

(Ditangianghon na martugas ma pangidoan naung dipasahat di bona ni parpunguan on)

Martangiang ma hita ...

- P.** Saonari pe rap ma hita manangianghon tangiang ”Sinode Diosesan VII Keuskupan Agung Medan”.
(Hal 2)

10. Tangiang Ama Nami

- P.** Nuaeng pe tapasada angka tangiang pangidoanta dohot tangiang naung niajarhon ni Jesus tu hita:

P+R Ama Nami na di banua ginjang ...

11. Papungu Kolekte

BETK No. 590

12. Tangiang Panimpuli

- P.** Martangiang ma hita,

Mauliate ma husombahon hami tu adopan-Mu ale Amang, ala nunga diparmudu-mudu Ho hami dibagasan partangiangnan nami on. Sai anggiat ma hata-Mi dohot angka panghataion nami tingki on, lam togu ma tutu angka keluarga nami. Jala sai anggiat ma marhite na rap mardalan, lam renta jala sahata-saoloan huhut saroha-sauduran ma hami. Saluhutna on hupasahat hami tu Ho marhite-hite Kristus, Tuhan nami.

R. Amen.

13. Mangido Pasupas

- P.** Tuhan i mandongani hita.

R. Saonari sahat rodi saleleng ni lelengna.

P. Sai anggiat ma Debata na Sun Gogo i mampargogoi, mangiringiring, jala mamasumasu hita asa gabe keluarga na marparange na denggan, dibagasan goar ni Ama, dohot Anak, dohot Tondi Porbadia.

R. Amen.

P. Angka dongan na hinaholongan, nuaeng pe partangianganta na paopathon taringot tu keluarga Katolik na sinodal jala marparange na denggan nunga be sun.

R. Mauliate ma di Debata.

14. Ende Panutup

BETK No. 607